

Empat kolej komuniti di Johor akan miliki kampus tetap - PM

Bernama
Mac 6, 2022

PONTIAN: Empat kolej komuniti di Johor akan mempunyai kampus tetap seperti diluluskan dalam Rancangan Malaysia Ke-12 (RMK12), kata Perdana Menteri Datuk Seri Ismail Sabri Yaakob.

Beliau berkata kolej komuniti berkenaan melibatkan Kolej Komuniti Bandar Tenggara, Kolej Komuniti Pagoh, Kolej Komuniti Parit Sulong dan Kolej Komuniti Simpang Renggam.

"Semua projek ini melibatkan kos atau siling peruntukan kira-kira RM61.2 juta," katanya ketika berucap dalam Majlis Pelancaran Kolej Komuniti@Pontian di Kompleks Muafakat Sungai Pinggan, Benut, dekat sini hari ini.

Turut hadir Menteri Besar Johor Datuk Hasni Mohammad dan Menteri Pengajian Tinggi Datuk Seri Dr Noraini Ahmad.

Ismail Sabri berkata dalam RMK12 juga, kerajaan telah mengenal pasti Pendidikan dan Latihan Teknikal dan Vokasional (TVET), sebagai satu daripada pemacu perubahan khususnya bagi memenuhi permintaan pekerja oleh pihak industri.

"Justeru, kerajaan bersetuju untuk memperuntukkan RM6.6 bilion bagi melaksanakan pelbagai inisiatif di bawah kementerian dan agensi berkaitan, termasuklah Jabatan Pendidikan Politeknik dan Kolej Komuniti (JPPKK) di bawah Kementerian Pengajian Tinggi (KPT).

"Pada 2022 juga, kerajaan memperuntukkan RM25 juta kepada JPPKK untuk melaksanakan program latihan TVET," kata Perdana Menteri dan menambah kerajaan turut menyasarkan 25,000 pelatih bakal mendapat manfaat daripada peruntukan ini.

Jelasnya kerajaan sangat komited memperkasakan komuniti setempat melalui agenda TVET yang merupakan manifestasi kepada usaha kerajaan, dalam membantu meningkatkan taraf hidup Keluarga Malaysia.

Dalam majlis tersebut, Ismail Sabri merasmikan pelancaran Kolej Komuniti Satelit di Pontian, yang merupakan kolej satelit kedua ditubuhkan di Johor selepas Kolej Komuniti Satelit di Parit Sulong.

Sementara itu, Noraini ketika berucap berkata pelancaran kolej komuniti satelit itu merupakan komitmen KPT untuk menjayakan Pelan Pembangunan Pendidikan Malaysia 2015-2025 dan Pelan Strategik Politeknik dan Kolej Komuniti 2018-2025 (PSPKK).

"Apa yang lebih utama, ini juga adalah manifestasi kerajaan dalam menyokong agenda pelaksanaan Penbelajaran Sepanjang Hayat (PSH) sebagai demi menambah ilmu, memperkasakan kemahiran dan meningkatkan taraf hidup komuniti setempat.

"Kolej Komuniti Satelit di Pontian ini djangka membantu merencanakan lagi ekonomi setempat melalui penyediaan program latihan, kemahiran, PSH dan keusahawanan kepada komuniti seperti golongan belia, warga emas, ibu tunggal, Orang Kurang Upaya serta B40," kata Noraini.

-- BERNAMA